



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10



Election nung nangzükba
ama shilem 90 bo inyakogo



Tebur cricket nung Sarah Taylor
mezüng tetsür coach kümogo

VOL. XIX NO. 22 (ADOK 22)

DIMAPUR

KÜPTOKNÜ (SATURDAY)

MONGPUTENI (OCTOBER) 30, 2021

₹ 5.00

NHL ajanga Rs 1.92 crore akoksa: NLACOPU

Kohima, October 29, 2021 (TYO): Nagaland Hotels Limited (NHL) ajanga Rs 1.92 crore takoksa anguba atema teblemstü abener ta Nagaland Assembly Committee on Public Undertakings (COPU)-i metetdaksüogo.

Comptroller Auditor General of India (CAG) report nung NHL ajanga takoksa anguba indang shia lir aser iba atema MLA Mhathung Yanthan menden ser COPU-i Hokolbarnü Nagaland nung sorkar meyong hotel ana semdanga liasü.

Rs 1.92 crore akoksaba meyipa angutsü atema lenmangtem lir ta Hotel Japfu semdanga sülen MLA Yanthan-i ashi. NHL indang hotel anaji Hotel Japfu, Kohima aser Hotel Saramati, Dimapur lir.

Committee balalai bangdak department dang aiben NHL ajanga takoksa anguba aziüktsü atema shia aruaka mapa kecha meinyak ta taküm February ita Assembly session alidang Committee-i shia liasü.

"Voluntary Retirement Scheme (VRS) mapa tenzüksü mesüra hotela ana indang Business plan asentshistsü teblembatem shiaka,

bangdak department-i mapa kecha meinyak" ta parnokisa ashi.

Hotel Japfu nung aliba takdangtem aser temeket reprangdanga senzüba sülen Yanthan-i ashiba agi "1980s mapang yangluba hotel tejen süaka kanga junga anepalua arur. Ano tajungba akümtsü lenmangtem lir anungji ketdangsürtemi tajungtiba nung anepalutsü ayongzük" ta ashi.

"Hotel ajanga tajangzük angutsü atema teblembatem taruba Assembly session nung benoktsü. Onoki onük ajak reprangshimdar aser bangdak department tem den lemsatepdar" ta Yanthan-isa metetdaksü.

"State sorkari NHL nem grant-in-aid Rs 1.92 crore tashi agütsüba nung takoksa angubaji sorkar akoksaba lir" ta paisa ashi.

Iba mapang COPU züngsem MLA Bongkhao Konyak, Commissioner & Secretary Nagaland Assembly P J Antony, Commissioner and Secretary Industries & Commerce Kekhrievor Kevichusa, Managing Director NHL H Pienyu aser General Manager Shurhovol Naleo nungertem liasü.

COVID-19 Nagaland: 39 dak putet & 20 taneptsü angu

Kohima, October 28, 2021 (TYO): Hokolbarnü Nagaland nung nisung 39 dak COVID-19 aliba putet aser parnok züngsema nisung ajak agi 31,811 kümogo.

"Tanü putetertemji Dimapur nung 24, Mokokchung nung 9, Kohima nung 5 aser Peren nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tesüiba ghonda 24 tsüngda COVID-19 puteta alir nisung 20 taneptsü angu. Parnokji Dimapur nung 10, Kohima nung 5, Wokha nung 4 aser Peren nung 1 lir" ta paisa ashi.

Nisung 31,811 rongnungi 29,864 taneptsü nguogo aser ibaji 93.87% taneptsü anguba lir, ta Dr Kikon-isa ashi.

Tang nisung 222 anepaludar saka parnok 172 dakbo shirangba yimya kecha mali, ta paisa ashi.

"Brihostibar tashi nung nisung 709,657-i COVID-19 vaccine indang dose 11,95,304 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,961, healthcare workers 15,998, arishi küm 45 ser tempur 202,088 aser arishi küm 18 nungi 44 tsüngda alir 430,610 lir" ta paisa ashi.

"Vaccine agirtem rongnung nisung 485,647-i dose anaprong agiogo. Parnokji frontline workers 47,974, healthcare workers 13,375, arishi küm 45 ser tempur 160,073 aser arishi küm 18 nungi 44 tsüngda alir 264,225 lir" ta Dr Thurr-isa ashi.

DoSE-i school lapoktsü atema tetuyuba kar agütsür

Dimapur, October 29, 2021 (TYO): November 1, 2021 nungi Nagaland kübok Rural Areas nung Class 1 nungi 4 tashi school lapoktsü aser sorkari lateta aliba SOPs sülen anidaksü ta Department of School Education (DoSE)-i metetdaksüogo.

Külen, Urban Areas nung aliba school temi pei pei District Task Force (DTF) nungi temelaba meshir ang SOPs sülen anidaka Class 1 nungi 4 tashi lapoktsü, ta parnokisa ashi.

DEOs/Sr. SDEOs/SDEOs-i District Task Force ajanga lateta aliba ama Class 1 nungi 4 tashi lapoktsü atema applications meshistsü aser ibaji DTF nem agütsütsüla, ta DoSE-isa ashi.

Rural aser Urban areas nung school tekolakpurtemi School Monitoring Portal (<https://school.dosenl.in/>) nung staff indang Weekly Vaccination Status osang agütsütsüla. Tekolakpurtemisa pei pei staff tem indang Vaccination Certificates/COVID-19 Test Results indang file ayutsüla ta DoSE-isa metetdaksüogo.

DEOs/Sr. SDEOs/SDEOs ajaki pei pei telongtet nung school tem mita aotsü atema Supervising Officers shima mapa nungloktsütsü. Supervising Officers-i hopta nung Hokolbar shia nikongdang 3:00 ako nung reports.dosenl@gmail.com nung Inspection Reports agütsütsüla, ta DoSE-isa ashi.

NSF küm 75 ajungbamong among



October 29, 2021 nü NSF indang 75 buba Foundation Day nung NSF lennir tejentem aser tang teinyakdak ketdangpurtem külemi agiba noksa angur.

Kohima, October 29, 2021 (TYO): Naga Students' Federation (NSF)-i Hokolbarnü 75 buba Foundation Day sentong ayonga agiogo.

Iba sentong nung taoba NSF Tir (1991-93) K Temjen Jamir-i NSF indang otsü tatsü agi lemsatepdang Naga kaketshirtemi mapa inyakba ajanga Naga yimten asoshi mapa inyakba tashi itshidaksü ta ashi.

Naga nungter telongjem aser yimten o sobaliba temetentem nung ajemdaker Naga Students' Federation (NSF) tentet, ta paisa metetdaksü.

"Iba senmang aser teblemstü khuret ya asenoki agizüka lir. Naga telongjem mesamatsü aser Naga nungter akhüm keta linük ka ama alitsü taginüba mesamadaksütsü atema asenoki taruba putu nem senmang aser teblemstü khuret amangdaksütsüla" ta K Temjen-isa ashi.

"Küm 75 tashi süia arudang asenok samatsütsüsa tashi anema asenoki tasü itta raraogo. NSF-i

teraksa bentsür arutsü tashi aser tsükchirtem aika madak takok nguogo aser parnoki maneni raksatsütsü meranger" ta paisa metetdaksü.

"NSF otsü ya Naga yimten otsü lir aser taoba mapang NSF lennir aikati Naga nungter asoshi bendanga agüja inyakba asenoki nguogo. Taoba NSF lennir aikati Naga nungter kümzüka ayutsü atema inyakdang Indian armed forces ket nung reshikangshiogo" ta Temjen-isa ashi.

"Lennir karbo pei ali aser rongsen kümzüka yunüdag kidanger state nung tepuokdak yuogo. Naga nungter lanur kaketshir karibo Naga nungter temeten kümzüka ayudang taküm bendanga agütsüogo. NSF-i ILP mita reprangba mapang Indian armed forces-i parnok züka merenshi aser karibo Naga nungter kaketshirtem asoshi lumia lungkak aitogo" ta K Temjen-isa tesüiba mapang atalokba kar lemsatep.

"NSF otsü ajanga asenok temolung ajema mebilemstüla

saka tali ajungmesotsüla. Item otsütem ya tanü aser tarutsü Naga kaketshirtem indang tashi angudak asütsüla" ta paisa ayongzük.

NSF tenzükertemi alizüng ayuba tongteta inyaktsü atema tashitait NSF lennirtem maneni adoktsü imlar, ta K Temjen-isa ashi.

Iba sentong nung taoba NSF Tir (2003-05), Achumbemo Kikon-ia 1947 küm NSF tentetba osang lemsatep.

Sentong nung NSF Tir Kegwayhun Tep-i anir tesentepertemi taoba lennirtem bilemteta tetushi agütsü.

NSF tatong tir Atokiho Sumi menden ser agiba sentong nung Chakhesang Baptist Church, Minister's Hill Kohima Pastor Rev Dr Wepre Mero-i temoatsü meshia sarasadem, Arenchenla Walling aser Keneisenuo Sorhie nati ken ajanga shilem agi, tongti tezülur Süpuni Ng Philo-i anküp tepela o jemi aser jilajitong zülur Mteisuding-i sarasadema tembang.

International Potato Center (CIP) ketdangsürtem Nagaland semdang

Dimapur, October 29, 2021 (TYO): APC & Mission Director, FOCUS-Nagaland, Y. Kikheto Sema, IAS-i anir ketdangsürtemi New Delhi nung Low-Cost Potato Seed Production System atema jembiba sülen tongti ketdangsürtem Nagaland-i aruogo.

Asia Regional Director of CIP Dr. Samarendu Mohanty, Dr. Sampriti Baruah, Project Coordinator for India, Philippines & Vietnam aser Dr. Mohinder Singh, Senior Consultant nungter yashi Nagaland tonga aru.

Parnok atongba sülen Agri Expo Dimapur nung Agriculture aser Horticulture Department indang tissue culture laboratories aser infrastructure facilities semdanga liasü.

October 29, 2021 nü CIP teloki APC & MD FOCUS-Nagaland aser Agriculture o Horticulture ketdangsürtem den senden ka amen.

"Nagaland nung alo metsüjang

kanga nungdaker ajisüaka aluyimer aikati India nungi metsüjang tajung bener arua metsünüteter. Iba jagi parnoki aonsotsü ayokertem dang nungi alo tamajungtem alizüka atemer" ta Kikheto Sema-i senden nung ashi.

"Chief Minister, Neiphiu Rio aser Agriculture Minister, G. Kaito Aye naprongi aluyimertem asoshi lenmang tajung lapoktsünür aser talisa zünger mapa mangu aliba lanurtem ajungmesotsü atema farming technology tasenten bener arunür" ta paisa metetdaksü.

Iba atema FOCUS-Nagaland-i IFAD (International Fund for Agriculture Development of the United Nations) dang alo metsü indang mapatong inyaktsü atema senotsü teyari meshi. Iba ajanga aluyimertem ajangzükba dang masü saka zünger mapa manguba lanurtem mapa inyakdak angutsü, ta Kikheto-isa ashi.

IFAD-i yaritsü molunga lir aser iba atema tenangzüktep agiba sülen State Horticulture Nursery nung aliba tissue culture laboratory tajungba kümdaksütsü. Mokokchung district kübok State Agricultural Research Station (SARS), Yisemyong nung main tissue culture laboratory lapoktsü teblemaba lir, ta paisa metetdaksü.

Dr. Mohanty-ia Nagaland sorkari mapa inyakba atema tenüngsang agütsür.

CIP-i novel low cost technology (Apical Rooted Cutting) inyaktsü aser iba ya Nagaland nung alo metsü adokdaksütsü atema lir, ta paisa ashi.

Nagaland nung tsünüsenbongtsü atema tsüngsang-mopung tajung lir aser küm nung anaben tashi tsünüba ajanga tanga state tem dangia alo metsü yoktsüsa inyaktetsü, ta Dr. Mohanty-isa metetdaksü.

Chuchuyimlang nung EAC quarter semzükogo



Dimapur, Mongputeni/Oct. 29 (TYO): Minister, PWD (Housing & Mechanical) Tongpang Ozukum-i October 28, 2021 nü Chuchuyimlang nung EAC quarter tasen semzükja liasü.

Iba ki semzüksüba sentong nung jembiba mapang Advisor, CAWD, Kazheto Kinimi-i Chuchuyimlang jila nung ketdangsür alitsü atema ki tajung ka sütsütsü asoshi melaba atema Minister Tongpang-i pelaba lemsatepa liasü.

Quarter tasen renemba ajanga administrator station

nung alitsü aser nüburtsem tajungtiba nung tenzüksü imlar, ta pai ashi.

Kasa mapang Minister Tongpang-i nüburtsem dang administrator nungita yaritsü ayongzuka liasü, kechiaser ibaji ajanga parnok mapatem tetsükdaksü majurui inyaktetsü, ta ashi.

Iba tesem nung aliba nüburtsem aser talisa ali kiburtemi terenlok balala nung tetsükdaksü magütsüra aser sorkar den tangatetep nung maneni maparen balala inyaka ora, Chuchuyimlang town nung EAC headquarter ya

asangsang nung SDO (C) jenjangi ajungketsü, ta pai ashi.

Iba sentong nung Merenjung, Associate Pastor, Youth, Chuchu Town Baptist Church menden liasü aser Er. Sungtiba Amer, Executive Engineer CAWD ajanga iba ki yangluba indang technical report agüja liasü.

Maneni sentong nung contractor, Adhoc urban station committee, Chuchu town aser Chuchuyimlang village council nungia o tatsütsü jembiba liasü aser Limakumla Pongener, EAC Chuchuyimlang ajanga melepzüng o jembi.

Kohima Law College ajanga Moot Court agitsü

Dimapur, Mongputeni/Oct. 29 (TYO): Kohima Law College ajanga October 30 nü college nung Moot Court agitsü aser yangji Mooter 29-i shilem agitsü.

Kohima Law College nung Professor-in-Charge, Kezhokhoto Savi lenisüba kübok küm shia telungjem, meranga inyakba aser ochishiba yimyatem temaba jenjangi ajungketsü nükjidong nung Moot Court ya agia arur. Moot Court ya Bar Council of India Practical Papers/Clinical Education nung shilem ka lir,

kong LL.B Degree atema semester 4 aser 6 indang practical paper pezü atema marks 400 lemzükja lir.

Moot Court agiba mapang LL.B 6th Semester nung azünger kaketshirtemi civil, criminal aser international cases nung shilem agir.

BCI Practical Paper/Clinical Education indang Professor-in-Charge, Asst. Professor Kezhokhoto Savi-i ashiba agi, tarutsü nung law azüngertem takok ngua obendanger tajung kumdaktsütsü mechi Moot Court ya ayongzuka agir, kong

kaketshirtemi legal language, o jembitsü yimya tajung, okadak nokdaksü yimyatem amala angazüker.

Moot Court ya kaketshirtem atema taila court ka lir. Iba Moot Court aliba ya ajanga law azüngertem ken o balala jembitsü atema temolung uludaktsür.

Iba sentong nung kaketshirtem ozüng balala nung o inteper.

Moot Court nung shilem agitsü atema kaketshirtem telok ana sadangtsür aser telok balala tenüng nung o inteper.

DC Kohima-i Special Summary Revision atema metetdaksü

Dimapur, Mongputeni/Oct. 29 (TYO): Deputy Commissioner aser District Election Officer, Kohima, Gregory Thejawelie, NCS ajanga sangdong ka nung, Special Summary Revision of Photo Electoral Roll dak sendakba nung 01.01.2022 ya

qualifying date ka ama draft publication ya November 1, 2021 nü renemtsü sentong lir, ta ashi.

Iba dak sendakba nung Kohima district nung aliba political party tem nungi teshimtet nübutem November 1, 2021 anepdang 10:00 ako

nung Deputy Commissioner indang Conference Hall nung draft publication atema sentong agiba nung arua adentsü metetdaksü.

Iba sentong nung political party tem nem draft roll indang copy agütsütsü, ta sangdong ajangasa ashi.



Rotary International Dist-3240 Rtn. Dr. Mohan S Konwar, District Governor ajanga October 29, 2021 nü Rotary Club Kohima semdangba mapang parnoki Senior Citizen Home semdang aser Rotary Club Kohima tir, Rtn.Kezhokhoto Savi-i anir sentong tatsüka agia liasü. Iba sentong nung Rotary Club Kohima nungi züngsemtem, DG, First Lady Asst. DG nungertem dena liasü. Sentong nung DG Asst. DG aser charter president Rtn.Dr. Rosemary Dziivichii nungeria o jembiba liasü aser chiyongtsü aser osettsüset teyari agüja liasü.

Tanü 7buba Economic Census indang SLCC senden amentsü

Dimapur, Mongputeni/Oct. 29 (TYO): Chief Secretary aser State Level Coordination Committee (SLCC) on 7th Economic Census indang mendenpubai sangdong ka nung, 7 buba Economic Census indang SLCC senden October 30, 2021 nü amentsü metetdaksü.

Iba senden ya Conference Room, Secretariat, Kohima nung anügang 11:00 ako nungi tenzüksü, kong 7th Economic Census indang provisional report asadanger agizüksü.

Iba senden nung SLCC züngsem ajak medema arua adentsü metetdaksü.

Nagaland Governor-i Chaga Gadi benjong salem abener

Dimapur, Mongputeni/Oct. 29 (TYO): Chaga Gadi benjongmung tenüng nung Liangmai kin aser Nagaland nung aliba nüburtsem dangi salem abener, ta Assam aser Nagaland Governor, Prof. Jagdish Mukhi-i sangdong ka nung ashi.

Tetsürtemi kibong nung shilem tulu agiba akhum agüja iba benjong ya alu ruzüker amunger. Iba mapang tamangba yimsü tsütsü telemsa makai ajak lungjemer yimjung lidaktsür.

Laniurtemi asen sobaliba tajung wazüka ayutsüla aser alemli tetsü-tebou nukla aser mangdang angatetsü merangtsüla, ta Governor-i ashi.

Asenoki COVID-19 protocol ajunga amshia iba benjong mungtima. Chaga Gadi benjong ya ajanga Liangmai kin aser Naga nung ajunga madak tesunep, telungjem aser

yimchiyimjung lidakjangma, ta pai moatsü.

N S C N / G P R N (Reformation) ajanga Zeliang kin den Chega-Gadi/ Lamsimngyi/ Kwakpo benjong salem lemsatepa liasü, koba October 30 aser 31 nung amunger.

Zeliang kin atema ibai tongtipangtiba benjong ka lir, kong chia-jema, pelatepa aser tenüngsang agüja amunger aser iba mapang Tsüngremi nüburtsem nem temoatsü makeploktür, ta amanga arur.

Iba benjong mapang sobaliba aser yimsü-yimpong tajung sayur. Ochishiba, kati ka akhum tsüpuba, meranga inyakba, tasü aitba aser aria bilemba nem nenok len anidakjang, ta NSCN/ GPRN (Reformation) indang MIP (Ministry of Information & Publicity) sangdong ka ajanga ashi.

MoS Kapil Moreshwar-i Kohima nung Farmer's Market lapoktsü



Kohima, Mongputeni/Oct. 29 (TYO): Minister of State for Panchayati Raj, Government of India, Kapil Moreshwar Patil-i October 29, 2021 nü T.Khel Model Village, Kohima nung Farmer's Market ka lapokja liasü. Iba sentong nung Minister, Rural Development, Metsubo Jamir aser department nungi ketdangsürtem dena liasü.

Iba Farmer's Market ya lenmang tezülen lir, aser yangji organic chiyongtsü aser teka agi yangluba osettem angur aser raliwalirtem atema restaurant ka dena lir.

T. Khel nung aliba aluyimer, Self Help Groups, NSRLM indang BLOs tem rongsen bendentsü asoshi maangka agütsütsü nükjidong nung iba market ya lapokja liasü.

State den yariteptsü Central sorkar renema lir: Moreshwar Patil

Kohima, Mongputeni/Oct. 29 (TYO): Minister of State for Panchayati Raj, Kapil Moreshwar Patil-i October 29, 2021 nü Hotel de Oriental Grand, Kohima nung osangbener den jembiba liasü.

meranga inyakba atema Patil-i tenüngsang agüja liasü.

Chief Minister-i "Terenlok atema yimjung aser yimjung atema terenlok" ta sangdongba asoshi tenüngsang agüja jembiba mapang, Gandhi mangdang den lirumedema Ato Kilonseri India nung yimtsüng ajunga melenshidaktsütsü tejangraba lir, ta MoS ajanga ashi.

Centre ajanga tenzükba Svamvita scheme indang jembiba mapang, State sorkar den MoU ka züluptetsü lir, ta pai ashi.

Nagaland ya tebour tajung state ka lir aser ibaji tourism ajungketba nung amshitetsü, koba ajanga state indang rongsenketzüng renloktsü, ta pai ashi.

Iba scheme nungi tajangzükba liasü aser nüburtsem ajangzüksü, kechiaser parnoki property card yanglutetsü aser kisü-jensü aser business atema kuli kaket tem nungi loan agitetsü, ta Patil-i ashi.

Iba atema state nem akoba lenmang nung teyari agütsütsü central sorkar renema lir, ta ashi.

Yimyak-yimtsüngtem nung terenlok bener arutsü mechi Self Help Groups aser Village Development Board temi alaketa

Paisa osangbener dang sorkar indang scheme aser sentong balala indang awareness nüburtsem nem angatetdakja state nung terenlok lidaktsütsü ayongzuka liasü.

Kameng ayong nung lishi tzü ayimer; Ango aika süogo



Guwahati, October 29, 2021 (Agencies): Arunachal Pradesh nung aliba Kameng ayong nung Brihostibar aonung nungi lisü tzü ayimer aser iba ajanga ango tasü aika adokogo.

West Kameng district administration-i iba temeket nung alirtem dang ayongi maotsü aser ango tasü bendena machitsü tetuyuba agütsüogo.

"Kameng ayong nung ango tasü aser taküm aika temai adokba osang angazükogo. Nisungtemi ango bendentsü atema aoba angashir saka ango nung miim chisemtsü akok" ta town magistrate Poonam Sonam-i ashi.

District administration-isa nübortem dang ango bener aruba shishilembadak mayoktsü tenokdangba agütsüogo.

Kameng ayong ya Tawang

district nungi ayimer aser iba ya South Tibet nung India-Tibet arrtsü nungi pokteter.

Iba ayong ya Arunachal Pradesh kübok West Kameng district aser Assam kübok Sonitpur district ajanger Tezpur nung Brahmaputra nung yimoker. Iba ayong dang Jiya Bharali ta-a ajar.

December, 2017 nunga Arunachal nung Siang ayong nung lisü tzü yima liasü.

Tripura BJP MLA Ashish Das-i TMC nung adentsü

Agartala, October 29, 2021 (Agencies): Deobarnü Tripura BJP MLA Ashish Das-i Trinamool Congress (TMC) nung adentsü terenemba lir.

Das-i TMC nung adentsü osang ya Tripura TMC president Ashish Lal Singh ajanga sangdonga liasü.

"Tesüiba ita ishika tejakdang nungi Ashish Das den jembia aru. Mepetmesü aser tenokdangba kar ajanga Das-i TMC nung adentsü thinena liasü. Ajisüaka, tang maparen ajak bentetogo aser October 31, 2021 nü pai iba party nung adentsü" ta Singh-i ashi.

"Ashish Das ya lennir tajung ka aser Tripura nung nüburtemi pa nungitta yaritsü. Atangji

nunga, tim mesüi yimsü asüba dak sendakba nung, Biplab Deb-i aniba BJP otia aitär aser tuteta jembitsür BJP lennir rongnung Das asütsü" ta Tripura TMC tanishirisa ashi.

TMC nung adenba sülen state TMC unit nung Ashish Das nem temaba menden ka agütsütsü, ta paisa metetdaksü.

Deobarnü sentong ka agitsü aser iba Party indang National general secretary aser Lok Sabha MP Abhishek Banerjee, shiba Deobarnü tonga arutsü, pa (Banerjee) matsüngdang TMC nung Ashish Das anioktsü.

Osang angazükba agi, Tripura kübok Surma constituency nungi BJP MLA Ashish Das ya state nung Biplab

Deb-i aniba BJP sorkar anema jembija aruogo.

"Manik Sarkar-i aniba Left Front sorkari tim mesüi yimsü asüba anentsütsü atema BJP dak tamang yur inyaka aru, saka ni BJP telok nung adenba ya aibelen tuluka liasü," ta taoba mapang Kolkata nung Ashish Das-i ashi.

October 6, 2021 nü Kolkata nung Ashish Das-i pa kou ajak ongdoker sülen Adi Ganga, koba Hooghly River indang ayongbangshi ka lir iba ayong nung tzü chikodok aser Kalighat temple nung sarasadem.

TMC nung madendang taoba mapang aibelenbatem atema tatok meshir ama ni iba ya inyaka liasü, ta Das-i ashi.



Assam Jatiya Parishad (AJP)-i Guwahati nung kechisarena nung jenjang atuba anema lungkak aitba sentong ka tenzüka agi. AJP züngsem aika adenshir Guwahati Club nungi Raj Bhavan, Kharguli tashi lungkak aita jaja. Iba sentong ya party president Lurin Jyoti Gogoi, Chittaranjan Basumatary aser Jagdip Bhuyan nung lenisüba kübok agia liasü.

Assam Congress-i BJP candidate Talukdar 'disqualify' asütsü akhanger

Guwahati, October 29, 2021 (Agencies): Bhawanipur nungi BJP candidate Phanidhar Talukdar disqualify asütsü atema Assam Congress-i election commission (EC) dangi shidi zülüogo.

BJP candidate Phanidhar Talukdar-i süpokrem amshiba aser ochimashi inyakba atema Assam Congress-i iba takhangba agütsü.

"Bhawanipur constituency nungi BJP candidate Phani Talukdar-i Bhawanipur nung par kima nung vote enoktsür nem sen agütsüba aser ochimashi inyakba indang video tem nguogo" ta Assam

Congress lennir Bobbeeta Sharma-i EC dang ashi.

"Iba ya Representation of the People's Act 1951 indang section 123(1) aser model code of conduct (MCC) alema inyakba lir" ta Sharma-i ashi.

"Assam Pradesh Congress Committee-i BJP candidate Phani Talukdar merenshitsü akhanger aser October 30, 2021 by-election nung shilem magidaksüi disqualify asütsü akhanger" ta Assam Congress lennir Bobbeeta Sharma-i Assam chief election officer Nitin Khade dang shidi nung shia lir.

Assam Forest Department indang frontline staff nem uniform agütsütsü

Guwahati, October 29, 2021 (Agencies): Assam sorkari Assam Forest Department nung inyaker nem uniform agütsütsü lemtetogo.

Sorkari Forest Guard/Game Watcher to Deputy Ranger/ Game keeper aser fixed pay workers ajak nem uniform agütsütsü.

Kümshia frontline staff shia nem uniform ana aser hunting shoes, woolen jersey, raincoat, cap amala nüngdakbatem agütsütsü ta sorkari ashi.

Guwahati nung Hokolbarnü Chief Minister Himanta Biswa Sarma menden ser Cabinet senden amendang iba

telemtetba agi.

Cabinet-isa Olympic medalist aser Assam boxer Lovlina Borgohain nem Deputy Superintendent of Police agütsütsü lemtet.

Assam Electronics Development Corporation (AMTRON)-i Education Department indang district office ajak nung Pension Seva Kendras lapoktsü.

Kritagyata portal ajanga pension papers yoktsü atema District offices aser Head of the Department (college Principals dena) District ketdangsurtem ama tashi agütsütsü ta tanü Cabinet-isa telemtetba agiogo.

Mizoram chief secretary inyaksü atema Renu Sharma shim



Aizawl, October 29, 2021 (Agencies): Centre-i Mizoram Chief Secretary inyaksü atema Indian Administrative Service (IAS) officer Renu Sharma shimogo.

Mizoram sorkari November 1 nungi additional chief secretary to the Chief Minister J.C. Ramthanga-i Chief Secretary inyaksü shimba den külemi Centre sorkari Renu Sharma shim.

Brihostibarnü Ministry of Home Affairs (MHA)-i sangdong agütsüba nung Sharma ji Delhi nungi mapa belener aser November 1 nungi Mizoram Chief Secretary inyaksü ta shia lir.

Mizoram Chief Secretary Lalnunmawia Chuaungo-i October 31 nü 'voluntary retirement' agir aser Sharma-i la melenzütsü.

Sharma ya 1988 batch nungi AGMUT cadre IAS officer ka lir aser taoba mapang Mizoram nung lai mapa inyakogo.

June 2011 aser August 2012 tsüngda lai Finance aser General administration department tem nung Commissioner aser Secretary inyakogo.

2016 küm la tanaben Mizoram-i mapa belen aser state home and personnel & administrative reforms department nung principal secretary inyak.

Külen, Mizoram sorkaria Brihostibarnü J.C. Ramthanga-i Chief Secretary inyaka atatsü shima liasü.

Ramthanga ya 1989 batch indang Manipur cadre IAS officer lir aser tang additional chief secretary to the Chief Minister inyaker.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

MONGPUTENI 30, 2021

Nagaland tensa meraksali

- P Tiamongba Aier

October 27 anepongi Dimapur nung nisung kari tesem asem nung injang khatokba osang angashia asenok kanga aoksatepogo. Iba osang angashili aikati telungpurtem mapa asütsü akok ta temolung melemi jembia liasü aser yamaji atangji police-iba tatalokba atema bushisüngdanga arur, telungpur asem den prangpong-injang apuba osang metetdaksüogo. Iba tatalokba indang osang angashidang, taoba mapang Nagaland tia aser tensa bilemteta aru. Anogoshia nisung khasetba, khatepba, pur aoba, merenshiba, tetsübu tia nung aliba mapang amato ano tanaben arutsü asü ta kanga dang shisabulua bilemogo. Tawa-tanü Naga yimten atema olemtepertem tsüngda jembishinü tenzüka arudang, külen Naga yimten telok kar tsüngda mepetmesü adokba osangtem angazüker aser iba ajanga Bodbarneep Dimapur nung injang khatoka amokmerenba angashidang asenoki telungpurtemi ang asütsü akok ta bilemtsüsa aküm. Joko taoba mapang Naga lima tensa tu tanaben meyipa marudaktsünür aser iba olaji asenok nübortem/public-i adoktsüla. Telungpur telok balala tsüngda tsükchitepa khatepba aser külen Indian Army ket nung reshikangshiba mapangtem tu khenyongi lepa marudaktsütsüla. Naga nüjiso atema mapa inyaka arudang Naga nungeri timtem-tuoshi jenti ajurua aruogo aser tapayutsü taküm aika laluogo. Anungji nisung ajaki iba tensa tu tanaben marudaktsütsü merangtsüla. Tanü Naga lima tia repringdangra, shia metetertem teimba kümogo anungji azütokshi mesüra tashiyim mapa inyakba ajanga masü saka shisatsü aser tangatetba ajanga tarutsü putu tajung yangertsü merangteptsüla. Taoba mapang ama masü tanübo Naga yimten telok teimbaka India sorkar den ceasefire tenangzüktep agia lir aser telok ajak den Ceasefire Ground Rules lateta lir. Anungji sendaka alir ajaki item telatetba sülen anidaktsüla aser tensa raksatsüsa mapa meinyaktsüla. Naga yimten asoshi inyakertemi injang khatoka amokmerenba mesüra tashiyim amshiba inyakyimtem toktsür, Naga nungeri adokba ola angashia yimjung aser telongjem asoshi inyaktsüla. Nagaland nung Naga nüjiso bushir telok onsara akümba den telok balala tenüng amer sarusaji manenba ajanga nisungtem lakja lakokogo. Nisungtemi joko laktetogo anungji telok mesüra nisung kari khen mekümdangdang tensa raksatsüsa mapa kar danga inyakra, nübortem ain adoktsü aser ibaji süngzüktsü tasak asütsü. Naga yimten teloktem tsüngda atsü-anem katepa, kati ka akhümtsübutepa aser alizüng ka atema dang inyaker ta asüba tangatetba nung longjemtsü merangtsüla. Külen, Nagaland state sorkaria tiyongtsü nung yariteper ta ashiba amaji, tiyongtsüi ia telok balala tsüngda apu latsütepa longjemdaktsütsü asoshi inyakba mapa agi sayutsüla. Tatemsa, Naga kin hohotem aser public lennirtemia shinga tsütsü tejak meshii, sabang ka nung ka küma tebong langer Naga yimten teloktem mesüra Nagaland state sorkar mesüra India sorkar nem tetuyuba agütsürtem aser yimjung yanglurtem asütsüla. Joko Nagaland-i tesüiba nung ajuruba tensa aser mapangtem tanaben lepa marudaktsüli.

- Yimozülur dangi-

Temeim Yimobilem zülur,

Tir Yimyim Olemsabang October 18,19 aser 20 adok nung adianu Matsüng Longkümeri adoba LGBTQI+ tebilemtsü aserr tanu lokti ocet nung ni angatetba kar lemsateber.

Asen teyanglur Tsüngremi alima nung nisung yangludang Pa mesukba nung tebur aser tetsür anaji tang yanglu. (Lipok 1:27) Pai tereprangtsü nungbo tetsür saka telun nungbo tebur mesura terprangtsü nungbo tebur saka telung nungbo tetsür ta meyanglu. Iba jagiang Tenüngsang ken 139: 14 nung ni tetsübuttsüka aser tesüngmangtsüka yanglua lir ta ashibaji shidak. Iba dak alaka tanu putu nung nisungtemi shi jangra atemtsü burabujia yanglutepbaji Teyanglur Tsüngrem anema lir.

Tanabuba nung, Teyaglur Tsüngremi tebur kaji tetsür ka den tang kibong akümtsü aser soyabokya aotsü mela. Pei sunutsü sua tetsür o tetsür na mesura tebur o tebur na kibong akümtsü melaa mali. Tanu putu nung tetsür o tetsür na mesüra tebur o tebur na kibong akümbaji mapang shidak nung tengupur shidak tesutep mangur saka shiazüapongbo jangratemnur ta asüba agi alitsüa akok. Ibaji nüktapangta temenen aser Teyanglur Tsüngrem anema lir.

Tasembuba nung ocet züluri teyangluba nisung (eunuch) indang shisema lir. Tejen lai mapang nung chubatsür anüktsü atema tebur tashi tait,asoajen tajung shimteter temzür chubatsür anuktsü yutsüba. Kodang tebur kaji temzür yutsüdir pai chubatsür mangsa suoshi melena mesüra tsü chikoa anguyunga azüabonga majitu aser nüktapangta mebenshitsü atema yamaji yanglur yutsür. Iba maa nisungji nuktapangta temenen masü teyazü jembiba mesüra tangar ashiochtsüba mesura tepsetba temenen bilemteta nangzükker Teyanglur Tsüngrem bushia arutsü akik aser Tsüngremi pa temenenji doker tekümtet agutsütsü akok. Tenyar mapa 8: 26 -38 nung shia alibaji iba ama teyangluba nisung ta nibo bilemer.

Tenyar Paulia iba indang kanga junga shia lir. Nisung kar yamlur asor, kar chubatsür anuktsü atema nisungi tenzür yanglur. Ano karbo shi mejebdoka meyangluyonga apei sasa pei temang aser tanela ajak Teyanglur Tsüngrem nem bendanga agutsür taküm ali tshi Tsüngrem tenzüktsü molungteter kibong mekümi Tsüngrem tenzükker. Ibji Tenyar Paul ama Tsüngrem nem bendanga agutsüba taküm. Aji saka ocet züluri shisembaj tera balaka ta angateter.

Pezübuba nung ocet züluri Arogo teinyaktsü (c) nung Tenlaki nung parnok shilem ta asüba oren nung yamai shia lir ": Arrogo/tenlaki ya temeshipur sentepdak masü saka temenenpur tekümzük angudak ta angateta parnoka sadema shilem agitsüsa asameyangtsüla".Ibayabo kamga tang onuk tuluka Arogo nung ajungoka yutsür amai bilemer.

Arogoji amangbapur temeshi mapa inyaktsü lungjemba telok ka. Tenlakiji amangpabur Teyanglur Tsüngrem meshiteta külemba jaka. Iba ama telok mesüra tekulemdaki nüktapangta nung alanger alir mesura Laishina tesayuba anema inyaker shinga marur. Anungji Lesbian, Gay marriage, Lesbian mesüra Qeer koba homoseksual lir item atema masü saka temenen nungi temolung meyiba Teyanglur Tsüngrem bushia arur teloki akümbaji Arogo aser tenlakiji Temeshi Tsüngrem külemba jaka ta angatetdi.

Tatemsa item shi azüapongertem atema Pauli Rom tapu 1: 26-28 nung yamai shia lir.

Anungji maksutsü shi azü jangraba nem Tsüngremi parnok bendanga agutsü. Kechiyong tetsürtemi yimya benshiba kazüba toktsür koba yimya masü aji parnok rongnung inyak. Aser kasaji teburtemia tetsür den kazüba yimya toktsür kati ka den jabujaritsü tenzük, aser parnok mashikoshi yimya benshiba talang pei dak atalok. Kechiaser metetba shisatsü agi inyaktsü menanzük nung tim masüba mapa inyaktsü aser taaktsü makaba temenen molungjang nem Tsüngremi parnok bendanga agutsü.

Anungji taaktsü maketba temenen nem bendanga magutsüdang kümdanga item nungi pilaa alitsü sayutsüji Arogo aser Sannukertem mapa tang masü amangbabur ajak teinyaktsü lr ta ku tangatetba iba olem sabang ajanga lemsateper. Tajung atema kongshia lira tajungba akümtsü merangdi

Dr Toshimanen Ozüküm, Kohima

Email: drtoshimanen2020@gmail.com

Whatsapp: 8974012777 Mobile 9436001594

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

OLONG PAITEP # 5981


1		2		3		4	5			
				6						7
		8								
9				10		11				
			12						13	
						14				
16						17				

TIPLÉN 1. Nisung jenti - (5) 4. Tsük rudenba - (5) 6. Temzüng tesashi - (5) 8. S_ _ _ i - (3) 9. Nisung rongnung telemsa - (3) 10. Anogoshi - (4) 12. Ajanga aor - (4) 13. Tsük rizüngdak - (3) 14. Tebang nungi adokba - (3) 16. Süngdong tatembangtiba - (5) 17. Meputep - (5)	LANGTSÜNGLEN 1. Tenük telong - (9) 2. Committee dang ajar - (5) 3. Yagi ki okdoker - (7) 5. Yim lenmang - (5) 7. Temoatsü keter meyipa aruba - (9) 11. Kanga junga menemba - (7) 12. Kenyongi majinü - (5) 13. Rong kanga tulu - (5)
--	---

OLONG PAITEP # 5980 TELANGZÜBA

TIPLÉN : 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.	LANGTSÜNGLEN : 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.
---	--

Noksa nung meputepi aliba 7 bushiang



TANÜBO NAI LANGZÜANG

Q. _____ nü Azadi Amrut Chai tenzükja liasü.
A. 21 Oct. B. 12 Oct. C. 23 Oct. D. 22 Oct.
_____ (Taruba adok nung onoki langzüsü)
YASHI ADOK TELANGZÜBA: 2017

AO OSHI ANGAZÜKDAK:
TANÜ ANGAZÜKTSÜBA OJANG



Lemtsü
(v) Lemsaa agütsü (distribute)
* Takari sensakertem nem jang lemstü.

Lemzük
(v) Pei shilem anguba (get a share)
* Takari jang lemstüba nungi nia kü shilem lemzük.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA

- October 30 nü asor tongtibang nisung kar:**
- King of Great Britain & Ireland, George II (1683)
 - Tanabuba U.S Tir, John Adams (1735)
 - Poet Ezra Pound (1885)
 - Indian physicist Homi Bhabha (1909)
 - Actor/director Henry Winkler (1945)
 - Footballer Diego Maradona (1960)
 - Wrestler Edge (1973)
 - Businesswoman/former presidential adviser Ivanka Trump (1981)
 - Actress Jun Ji-hyun (1981)
 - Model/actor Eva Marcille (1984)
 - Model Ashley Graham (1987)
 - U.S. Olympic gold medal-winning gymnast Nastia Liukin (1989)

SUDOKU # 6022 TELANGZÜBA # 6021

7		4				6		7	1	3	9	2	8	6	5	4	
	8		9		7	4			5	9	6	1	7	4	8	3	2
			8		6		3		2	8	4	6	5	3	7	9	1
	9	3							8	4	9	7	3	2	1	6	5
				6	9				1	3	2	5	8	6	9	4	7
	4		3	7	5	1	9		6	5	7	4	9	1	2	8	3
							7		3	6	8	2	1	5	4	7	9
4								5	9	2	5	8	4	7	3	1	6
	2		4	1					4	7	1	3	6	9	5	2	8

OJANG LUTEP # 5568

KAÜÜSM	:									
THAISSSÜ	:									
IAG	:									
SMAÜ	:									
AAMLI	:									
EIMMAB	:									
LIRENN	:									
AAM	:									
RNÜUB	:									
TZENNÜKAG	:									

OJANG LUTEP TELANGZÜBA # 5567
TEBANG AGIDANG ABENSA JEMBIBA MASÜ MAPA
AGIA INYAKA SAYU TAJUNGBA

TAN HOPTA ATEMA - KOMA SÜLA ?

Q. Naga nunger yimten tebilemstü ken o ya India-i, Naga nunger tanga teloktem yutsür, NNPGs telok den dang latet nunga koma süla ?

PM Modi-i European Council Tir aser European Commission Tir na ajuru



Rome, October 29, 2021: G20 senden nung adentsü atema Hokolbarnü Ato kilonser, Narendra Modi Rome tonga aodang tangokba noksa nung angur.

Rome, Mongputeni/October 29 (Agencies): Hokolbarnü Rome nung India Ato kilonser, Narendra Modi-i European Council Tir, Charles Michel aser European Commission Tir, Ursula Von Der Leyen na ajurua senden amen, iba mapang nungji parnoki rongsenkettsüing jenjang tajungba akümtsü aser nüburtem tsüingda tesendaktep tajungba akümba ajanga alima tajungba kümdaktsütsü atema o lemtepa liasü.

G20 senden nung pa densema linük balala nungi lenirtemi alima rongsenkettsüing aser covid wara sülen asentenshitsü, sustainable development aser climate change onüktem nung o lemteptsü. Modi Rome tonga aoba sülen tang mezüing pai lenir ana den senden amen.

Prime Minister's Office-i twitter ajanga, "Rome nung official senden tenzüka @eucopresident Charles Michel aser @vonderleyen, President @EU_Commission na den tajangzük kaa senden

menogo. Lenirtemi rongsenkettsüing jenjang tajungba akümtsü aser nüburtem tsüingda tesendaktep ajanga alima tajungba akümtsü atema o lemtepa liasü," ta metetdaksü.

1960s mapang nungi India-EU tsüingda tesendaktep yanglua liasü, aser 1962 küm European Economic Community den tesendaktep yanglur mezüingpurtem rongnung India densema lir.

India-EU mezüingbuba senden 2000 küm June 28 nü Lisbon nung amenba mapang nungi tesendaktep tajungba kümogo.

October 29 nungi November 2 tsüingda Ato kilonser, Modi-i G20 senden aser climate change senden na nung shilem agia adentsü.

October 30 aser 31 nü Italy nung G-20 senden nung Modi-i Afghanistan tensa, climate change aser coronavirus wara atema alima linüktemi longjemer inyaksü atema jembitsü imlar.

Italy Ato kilonser, Mario

Draghi-i jaokba nung ajemdaker Modi-i Rome nung ayongzükba 16buba G-20 Summit nung adener.

G-20 telok nung alima nung rongsenkettsüing tulu aliba linüktem lir. Alima nung GDP shilem 80 bo item linüktem nung lir aser alima nung shishilembaba shilem 75 item linüktem nung lir.

Rome nung ayongzükba G20 senden nung züingsem linüktem nungi tekolakpurtem, European Union nung ketdangsertem, tejaoker linüktem nungi lenirtem aser international organisations balala nungi lenirtem aika adentsü.

Iba senden nungji G-20 lenirtemi coronavirus wara, climate change aser sensak tia agientsü atema tongti süa jembitsü. Iba dak alia Afghanistan tensa atema-a jembitsü.

British Ato kilonser, Boris Johnson-i jaokba nung ajemdaker Modi-i climate summit nung adentsü. Iba senden ya November 1 aser November 2 anogotem nung amentsü.

India nung ano nisung 14,348 dak Covid putet

New Delhi, October 29 (Agencies): India nung ano nisung 14,348 dak coronavirus tashidak putetogo aser tang tashi nung nisung 3,42,46,157 dak iba tashidak putetogo, ta Hokolbarnü Union Health Ministry-i metetdaksü.

Tang linük nung coronavirus agi teshirangdakpur ano timba küma tang teshirangdakpur 1,61,334 lir, ta Hokolbarne

Health Ministry-i metetdaksü. Tesüiba ghonda 24 tsüingda iba tashidak agi shiranger 805 süogo aser tang tashi nung ajak senteperbo 4,57,191 süogo.

Tesüiba anogo 35 tashi linük nung anogo shia coronavirus case putetbaji 30,000 den tajemba lir aser tesüiba anogo 124 tashi anogo shia case 50,000 den tajemba puteta arudar.

Yaküm August 7 nü tashi

nung India nung coronavirus case lakh 20 ajung, August 23 nü lakh 30, September 5 nü lakh 40, September 16 nü lakh 50, September 28 nü lakh 60, October 11 nü lakh 70, October 29 nü lakh 80, November 20 nü lakh 90 aser December 19 nü coronavirus case crore 1 junga liasü.

Taküm May 4 nü linük nung coronavirus case crore 2 ajung aser June 23 nü crore 3 junga liasü.



October 29, 2021 nü Uttar Pradesh kübok Prayagraj nung aliba Tej Bahadur Sapru sorkar hospital nung dengue agi shirangertem treatment agiba noksa nung angur.

TMC-i Goa Assembly Elections nung tokteptsü: Mamata Banerjee

Panaji, October 29 (Agencies): TMC (Trinamool Congress)-i Hindu nung tekülem ki, Khristantem Tenla ki aser Muslim nung tekülem ki- mosque atema nokdaker, ta shia Hokolbarnü TMC tongti lenir, Mamata Banerjee-i, lar party-i vote melemsatsü saka Goa election nung tokteptsü, ta metetdaksü.

West Bengal Chief Minister, Mamata Banerjee-i Goa anogo asemnü semdanga Brihostibarnü Goa tonga oa liasü.

"Ni Goa-i aruba mapang nung nenoki kü noksatem raksatsür. Saka India nung nenok noksa raksatsütsü," ta lai ashi.

Goa nung BJP aitsüba olen ka nung lai, "Nenoki onok noksatem (posters) raksatsür, wako tanak sayur, sentong agitsü atema temelaba magütsür, kechiyong TMC jenjang ajungtsü ta nenoki meteta lir," ta ashi.

Lar party-i Goa elections nung tokteptsü, aser ibaji vote lemsatsü atema masü saka state tashi taitba kümdaktsütsü aser tangar dak memetaloki lidaktsütsü atema lir, ta lai ashi.

"Ozü party-i tamangba yimsü nung ajemdaker

nüburtem tsüingda telemsa madokdaksür; onoki Hindu nung süaka, Muslim nung süaka mesüra Khristantem süaka parnok tsüingda telemsa madokdaksür," ta lai ashi.

Taruba Goa Assembly election nung TMC-i menden 40 prongla nungi tokteptsü aser lenir aika lar party nung anioktsü, ta party-i sangdongogo.

Sangküm küm tetenzüklen election agitsü lia tang lai Goa semdangba ya state nung party nung inyakerkem melung ajungmesotsü atema lir.

Goa nung TMC lenirtem den shisa lemsatepba mapang nung lai, Goa nung TMC-i takok ngura party-i mangyangtsü atema meinyaktsü saka state atema dang inyaktsü, ta ashi.

West Bengal nung TMC-i nüburtem atema scheme balala tenzüksüba metetdakja lai, TMC-i Bengal nung inyaktetra Goa ama state tilaka nunga inyaktetsü, ta ashi.

"Ni pelashishia ibaji inyaktsü. Ni Goa nung chief minister makümtsü saka ni yamaji inyaktsü aser sorkar nung ochimashi malitsü," ta lai ashi.

TMC ya national party ka lir, anungji party-i tesem ajak nung tokteptetsü, ta laisa shisem.

Election nung nangzükba ama shilem 90 bo inyakogo: Amit Shah



October 29, 2021 nü Union Home Minister, Amit Shah Lucknow tonga arudang party nung inyakerkem pa agizükba noksa nung angur.

New Delhi, October 29 (Agencies): Hokolbarnü Union home minister Amit Shah-i, BJP-i election mapang nung nangzükba ama shilem 90 bo inyakadokogo, ta metetdaksü.

2022 küm Uttar Pradesh assembly election atema BJP terenemshiba jenjang asadangtsü atema Shah-i anogo ananü state semdanga Honokbarnü Lucknow tonga aru.

Lucknow nung 'My Family-BJP Family' membership campaign tenzüksüba sentong nung jembidang Shah-i Uttar Pradesh chief minister Yogi Adityanath nem tenüngsang agütsü.

"Tanübo ni iba ya nüma tanga ashir- 2017 election mapang nung onoki manifesto nung nangzükbatem Yogi aser par team-i shilem 90 bo inyakogo. Ni Yogi dang taruba itatem nung tanünga

tenangzükba ajakji inyaktsü mepishir, aser ibaji ajanga nüburtemi, BJP-i nangzükba ama inyaker ta metetsü," ta metetdaksü.

Opposition party tem aija Shah-i, "Tesüiba küm pongu tashi nisungtem (opposition party tem) kidang dang liasü, saka tangbo parnoki sorkar akümtsü ta bilema kimai ayazüker. Akhilesh Yadav (Samajwadi Party lenir aser taoba mapang CM)-i Uttar Pradesh nüburtem dang pa bendanglen mapang kobika aliar ashitsüla. Covid wara mapang aser tzümetsüing lendong mapang nung pa kong liasü? Parnoki parnok kibongtem atema dang inyaker," ta metetdaksü.

"UP ya mapa inyakba Buddha lima lir. BJP-i sensakerkem aser meshimejungertem atema nokdaker," ta home minister-isa metetdaksü.



Washington nung aliba Capitol Hill nung House Democrats tem ajurui US Tir, Joe Biden aoba mapang tangokba noksa ka yangi angur. Tir den House Speaker Nancy Pelosi, D-Calif., (tiyong), Majority Leader Rep. Steny Hoyer, D-Md., aser Rep. Jamie Raskin, D-Md., (achichi) nungertema angur.

Tonga nung coronavirus cases mezüngbuba putetogo

Nuku'alofa, Mongputeni/Oct. 29 (Agencies): New Zealand nungi arur ka dak coronavirus tashidak putetba sülen Tonga asetkong linük nung COVID-19 agi meneper ibaji mezüngbuba alitsü.

Hokulbarnü radio ajanga Tonga Ato Kilonser Pohiva Tu'i'onetua-i jembiba mapang, Christchurch yimti nungi arur passenger 215 rongnung COVID-19 cases ka liasü, ta ashi.

New Zealand northeast tsütsü aliba Tonga nungya nütsüng yongsük 106,000 shi lir. Tonga nütsüng yongsük shilem 31 shi COVID-19 mozü course tema agiogo aser shilem 48 shi dose ka agir lir, ta Our World in Data research

group ajanga ashir.

Alima nung COVID-19 tashidak nungi jenbua aliba linük ishika rongnung iba asetkong ya ka liasü. Par kidanger linük aika ama Tonga ya danga linüktem nungi pila aliba ajanga tashidak nungi kumzüka liasü, saka health system tashi mait alinung virus yagi kongshi nungbo lendong tulu asütsü.

Anasa aliba Fiji nunga April ita tashi COVID-19 nungi kanga junga jenbua aru, saka iba tashidak Delta variant pokloka iba asetkong nung nisung 50,000 dak tema menep aser 673 shi asü.

Linük nung lockdown benoktsü asü masüar jembishinüba sülen Hombarnü

sangdongtsü, ta Tu'i'onetua-i ashi.

Kasa mapang ato kilonseri Tonga nübur ajunga dang social distancing yimya amshitsü aser coronavirus dak sendakba ozüngtem sülen anidaktsü ayongzüka liasü.

Christchurch nungi tayimtsü arudang Fua'amotu airport nung inyaka alir health worker, police aser staff tem ajunga quarantine nung lir, ta health ministry indang chief executive Siale 'Akau'ola-i ashi. Tayimtsü anasa inyaker ajunga vaccine agir liasü, ta pai ashi.

Iba tayimtsü nungya mapa inyaker aser Tonga indang Olympic team züngsemtem liasü.

Myanmarya kibongnung shilem ka lir: ASEAN

Bandar Seri Begawan, Mongputeni/Oct. 29 (Agencies): Taoba senden April ita amendang tanaben tatok agütsütepa lungjemshitsü jembiba ama Myanmar general Min Aung Hlaing-i meinyakba yong Southeast Asean regional telok senden nung Myanmar mitkar tekolakba ya adentsü memelaba sülen Myanmar ya ASEAN kibongnung shilem ka lir, ta Brunei-i ashi.

Mitkartemi February ita yimten tashi rakzüik, civilian lenir Aung San Suu Kyi apu aser nüburtemi longkak aita rongsenketzüng jenjang mejungi kumdaktsü.

Mitkari tashiyim amshia sorkar atsüngdokba anema nokdaker pua merenshiba maparen nung nisung 1,200 dak tema takum samaogo, aser Min Aung Hlaing-i Association of Southeast Asian Nations (ASEAN) indang lenirtem den pangzüngtepba 'Five Point Consensus' nung shilem ka ama azüdokshi anentsü nangzükaka arütsülen tensa memelenshir.

Mitkar tekolakba senden nung mejaokba sülen Myanmar tarutsü shilem koma asütsü, ta asüngdangba mapang Brunei indang Sultan Hassanah Bolikiah-i iba linük züngsem maneni alitsüla, ta langzüa liasü.

"Myanmar ya ASEAN kibongnung tongtipang shilem ka lir aser par züngsem indang mejembir. Myanmar atema ASEAN teti alitsü aser five point consensus mapa kuma inyaka aoba nung maneni yariteptsü," ta pai ashi.

Iba pangzüng nungya nüburtem den jembishinü tenzüksüba aser nüburtem nem teyari balala agütsüdaktsütsü aser special ASEAN envoy

ajanga tetsüngtai ia yimjung ken o jembitsüba dena lir.

Online nung asemnü mener Brehostibarnü tembangba senden nungya Sultan Hassanah Bolikiah mendenpuba liasü aser pai yimtenren tsütsü mepetmesü adoka aliba tangatetep kati arutsü atema züngsem 10 agi kumtetba ASEAN envoy tem den mitkar lenir temi inyaktü imlar aser par nüburtemi aginüba ama Myanmar tensa tajungba akumtsü, ta shia liasü.

Osangbener senden balaka nung jembiba mapang Malaysian Foreign Minister Saifuddin Abdullah-i senden nung Myanmar madenba ya pari shimtetba lir aser tarutsü nunga parnok iba telok indang senden nung adentsüba indang mejangja, ta shia liasü.

"Ibaji sen dollar million ka jenjang tasüngdangba lir, koba ni melangzütetsü," ta Saifuddin-i ashi.

Tan hopta senden ya Brunei mendenpuba sür amenba tatembangba alitsü.

Tangbo iba tentet nung Cambodia tekolakba kumogo.

Cambodia-i Myanmar den maneni ajungshia jembitsü, kong civil wara adoktsü ana-meta nung lir, ta Foreign Minister Prak Sokhonn-i Brehostibarnü osangbener dang shia liasü.

Ita ishika atsütepa aruba sülen ASEAN ajanga Brunei indang Second Foreign Minister Erywan Yusof ya ASEAN indang special Myanmar envoy shimteta liasü.

Saka pai tang tashi iba linük ya mesemdangteti lir, kechiaser mitkartemi pa Aung San Suu Kyi den ajuruteptsü memelar.

Taoba mitkar yimsüsür kübok Myanmar ya 1997 kum ASEAN nung dena liasü.

Sudan yimtiba nung rongong tali adoker, asür timba kumogo

Khartoum, Mongputeni/Oct. 29 (Agencies): Sudan nung democracy dangi melenba raksaja mitkartemi tashiyim amshia sorkar atsüngdokba anema nokdaker aser security forces tsüngta raraba manener, United States aser United Nations ajanga mitkar sorkar tasenba dang civilian nem tashi meyipa agütsütsü ajungshir.

Khartoum nung mitkar tashi amshia sorkar atsüngdokba anema nokdaker aser sepaitem tsüngta pezünü buba atsütepba mapang Brehostibarnü longkak aiter ka tepset, ta doctor temi ashir, aser UN Security Council ajanga mitkar dang parnoki Hombarnü atsüngdokba civilian sorkar tanaben amenokshiang ta ashir.

Northeast Africa nung makamait agi sünger aliba linük, Sudan nung mitkartemi yimsü asüba atema UN Security Council ajanga sangdong ka nung aitsü aser telok ajunga dang talenba makai ken o jembishinütsü ajungshia liasü.

UN Security Council ajanga

iba osang sangdongba sülen US Tir, Joe Biden-ia par linük longkak aiter den lir, ta ashi.

"Lungjemer Sudan indang mitkar lenirtem dang onok tangatetba jangja-jangja ashir - Sudan nüburtem yimjung nung longkak aitsü melatsüla aser civilian-i aniba transitional government tanaben tentetsüla," ta pai sangdong ka nung ashi.

"Anogo ishika tsüngta atalokba ya kanga tesasatsüka lir, saka United States maneni Sudan nübur aser parnoki azüdokshi mesüi timtemba den nokdaktsü," ta Biden-i ashi.

2019 kum nungi Sudan lenir ama arusang General Abdel Fattah al-Burhan-i mapang talangka nungi yimsü süa arusang Omar al-Bashir yimsüsüba menden nungi atsüngdoka liasü aser pai Hombarnü linük sorkar anentsü.

Ato Kilonser Abdalla Hamdok ya par kidang pua yua lir, saka linük yimtiba nung anogoshi anisüngzük makai nüburtemi longkak aiter aser

ano Honibarnü longkak tesashitiba aitsü sentong lir.

Lenmangtem nung long, jana aser gari tyre arongba agi mokdanga ayu aser civil disobedience nung shilem ka ama dokan timba shibanga liasü.

"Onoki mitkar yimsüsüba maginer, iba linük nung onoki democratic yimya nung talenba maliba takum liner," ta longkak aiter kati osangbener dang ashi.

Khartoum anüdoklen Burri district aser Khartoum North nung Brehostibarnü yazüdokshia liasü, ta osangbeneri ashi.

Khartoum North nung rongrong adokdak longkak aiter ka asü, ta longkak aiter den sendaktepa aliba doctor tem indang committee kati ashi.

Hombarnü mitkartemi tashiyim amshia sorkar atsüngdokba sülen tang tashinung longkak aiter nisung ti tepsetogo. Nisung 170 shi yirua lir.

Brehostibarnü longkak aiter dak tear gas aser rubber agi meyibanga aliba injang khalokja

liasü, aser iba mapang nisung aika yiru, ta tenük kuli alirtemi ashi.

World Bank aser United States ajanga teyari soita lir aser mitkartemi tashi rakzüikba aitsür, aser African Union-ia Sudan züngsem khen atema agienja lir.

US, EU, United Kingdom, Norway aser danga linüktem lungjemer osang ka sangdongba nung ato kilonser aser par cabinet ya transitional government nung chichiba lenirtem lir, ta ashi.

Civilian kistüngi yimsü asüba dangi meyipba nung shilem ka ama 2019 kum August ita nungi tenzüka Sudan ya civilian-military council kati yimsü süa arur, aser yangji Hamdok indang administration dena lir.

Sorkari teyari agüja kiralongra mapa inyakba linük ka, ta taoba mapang US ajanga sangdonga aliba linük ya teyari angutsü aser senotsü indoka company balala amenoktsü teimla nung linük balala den tanaben jungteptsü meranga arua liasü.

Saka mitkartemi tashi merakzüik tsüngta civilian tashi ajema kumer liasü aser yamaji mitkar lenirtemi linük nung tashi amshia arur, ta teshisadanger temi ashir.

2019 kum nübur ajungai longkak aiter ama Sudan nung democracy busemertemi Honibarnü "million-strong protests" atema ayongzüka lir.

Longkak aiter kati Brehostibarnü ashiba agi, security forces temi yashinep nungi onoki lenmang nokdanga yua aliba osettem agientsü meranger aser onok dak tear gas aser rubber bullets khaloktsür.

"Ajisüaka sepaitem aoba sülen onok oa tanaben yanglushir. Civilian sorkar aruba sülen ang onoki lenmang nokdanga aliba agientsü," ta Khartoum nung longkak aiter kati ashi.

Al-Bashir-i kum 30 shi yimsü süa aruba mapang mitkar tanishir alisang Al-Burhan-i US, EU, China aser France densema Sudanese ambassador trok mapa nungi anentsüogo.

Advisor Sukhalu-i Showroom ka lapoktsüogo



Kohima, Mongputeni/October 29, 2021 (TYO): Hokolbarnü, TCP Gate, Kohima anasa K.K. Angami Complex nung, Advisor, School Education K. T. Sukhalu-i Crimsoune Club "The Exclusive Showroom" lapokja liasü, ta sangdong ajanga metetdaksü.

Iba showroom lapokba sentong nung, Sukhalu-i jembiba liasü aser tasa tajung amshia maparen takok ngua inyakba atema pai Crimsoune Club

indang proprietor, Nirmal Jain dang pelaba metetdaksü.

Sukhalu-i ashiba agi, Kohima nung shishilembaba tesemtem ainba/renloka aoba angudang pelaseter aser jila nung iba ama brand' tajung indang company amenokba ajanga lisopurtem tali atsüa arutsü, ta pai shisem.

Crimsoune Club indang Proprietor, Nirmal Jain-i, Crimsoune Club ya award anguba aser nungtugu fashion brand ka lir, koba 2005 küm ngutet aser iba

brand ajanga sentong balala atema casual aser tawa tanü fashion den apet sübosülemtsü balala adoker, ta ashi.

Nirmal-i, Mangla Apparels, koba Crimsoune Club indang 'parent company' ka lir, iba company den Club tesendaktep tajung yanglua lir. Mangla Apparels ya multi-dimensional textile company ka lir aser küm 80 dak tema textiles yangluba maparen nung takok ngua arudar, ta metetdaksü.

DoSE ajanga quiz competition ayongzük

Kohima, Mongputeni/October 29, 2021 (TYO): Azadi Ka Amrit Mahotsav shilem ama, Hokolbarnü Department of School Education (DoSE) ajanga "India's Independence Movement & National Unity 'India Quiz'" nung quiz competition ka ayonga agiogo. Iba sentong atema Nagaland Education Project- The Lighthouse (NECTAR) ajanga senotsü teyari agütsü aser Morung Conference Hall, Directorate of School Education Kohima nung iba sentong agia liasü, ta sangdong ajanga metetdaksü.

Iba quiz competition nung Kohima, Dimapur, Peren, Wokha aser Longleng nungi school 29 nungi kaketshir 87 agi shilem agiogo.

DoSE ajanga ayongba quiz tetoktepba nung, Fernwood School Kohima nungi Ayangdi Pongen, Eyotso Rhutso aser Dongkoi Mercy Lam nungeri mezüngbuba jenjang nung takok

angu. Par asempronlga nem senpet 10,000/- den certificate agütsü.

Kasa tetoktepba nung, Livingstone Foundation International Hr. Sec. School Dimapur nungi Mutsulu Venuh, Vinyuhunuo Dzuvichu aser Manshi Rathore nungeri tanabuba jenjang ajangzükset. Par asempronlga nem senpet 7000/- den certificate agütsüogo.

Little Star Hr. Sec. School Dimapur nungi Lenni Samuel, Nonya Komyak aser Shubham Kumar Singh nungeri iba tetoktepba nung tasembuba jenjang ajangzükset; aser parnok nem senpet 5000/- den certificate agütsü.

Iba den külemi, quiz competition nung shilem agir ajak nem certificate agütsü liasü.

Iba quiz tetoktepba atema 'quizmaster' ji Rajkumar M. IFS, Divisional Forest Officer, Kohima liasü. Rajkumar ya MENSA, koba international high IQ society ka lir, iba tentet

nung pa züngsem (lifetime member) ka lir.

Rajkumar ya 'quiz' sentong nung tasüngdang aser Quizmaster takotet ka lir, shibai India kübok State balala nung quiz tetoktepba sentong 30 dak tema achaayanga agiogo. Pai achaayanga quiz sentong balala nung Civil servant, corporate employees, college aser school kaketshirtemi shilem agiogo.

Maneni, iba sentong tetenzüklen, Principal Director School Education aser Project Director, NEP-The Lighthouse (NECTAR), Shanavas C. IAS-i okila jembiba; aser, Deputy Project Director, NEP-The Lighthouse (NECTAR), Avelu Ruho, NCS-i telok pela agizük, ta kasa sangdong nung shia lir.

Phek DWO ajanga metetdaksür

Phek, Mongputeni/October 29, 2021 (TYO): District Welfare Officer, Phek, Anyile Khamo-i sangdong ka ajanga, National Social Assistance Programme (NSAP) aser State Welfare Programme indang payment November 05, 2021 nü nungi District Welfare Officer Office (DWO), Phek nung

office mapang tenzüktsü, ta metetdaksü.

Anungji, Village/Town Chairman ajaki pei pei tata Village/Town indang pension scheme den tajangzük angutsüpurtem indang payment book aser register tem bendentsü asoshi tetuyuba agütsür, ta Khamo-isa ashi.

* Tentative Payment Schedule

Sl. No.	ICDS PROJECT	DATE OF PAYMENT
1	CHOZUBA	5th & 6th November 2021
2	KIKRUMA	9th & 10th November 2021
3	PFUTSERO	11th & 12th November 2021
4	CHIZAMI	15th & 16th November 2021
5	MELURI	17th & 18th November 2021
6	PHEK	22nd & 23rd November 2021

ADVERTISEMENT

Application are invited for filling up a post of Science teacher in Mount Moriah School, Ungma to teach in higher classes.

Qualification : B.Sc with Maths

Last date of submission of application with complete documents: 30th Nov.2021

Sd/-
L. Temsu Jamir
Chairman, Managing Board
MMS, Ungma

Dr. L. Temjen Jamir
Headmaster
MMS, Ungma
Contact No: 9436016198

In the Court of
Principal District & Sessions Judge
Mokokchung: Nagaland

S/C NO. 199/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Moatemsu Yaden has been applied by Smti. Tsukjemrenla W/o Lt. Moatemsu Yaden R/o H.No.178 Borbora Ward Tuli, Mkg. Nagaland for possession of:

GPF, GIS, Gratuity, Leave encashment, Pension etc, Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 22.11.2021.

Given under the hand and seal of the court on this the 22.10.2021.

Sd/-

Principal District & Sessions Judge
Mokokchung: Nagaland

GOVERNMENT OF NAGALAND
DIRECTORATE OF TECHNICAL EDUCATION
NAGALAND : KOHIMA

No. **DTE/SCHO/PS/AICTE/21**

Kohima, dated the 28th October, 2021

NOTIFICATION

This is to inform the concerned that AICTE (All India Council for Technical Education) New-Delhi invites online applications on National Scholarship Portal (www.scholarships.gov.in) under AICTE SWANATH SCHOLARSHIP SCHEME (Both Degree and Diploma Level) from the eligible students for the following categories:

- Orphan
- Either or both parents died due to Covid-19
- Wards of Armed Forces and Central Paramilitary Forces martyred in action (Shaheed)

The detailed guidelines of the aforesaid scheme are available at AICTE website. The Students are advised to submit their online applications well in time in NSP so that their Institutions are able to complete the first level verification of applications within the prescribed timeline.

The Last date for submission of online application is 30.11.2021

(ER. M NAKRO)

ADDL.DIRECTOR & HOD

Issued by DIPR

Tanü Aryan Khan tepuokdak nungi chioktsü

Mumbai, Mongputeni/October 29, 2021 (Agencies): Hokolbarnü, Mumbai indang Arthur Road Jail ketdangsurtemi, Aryan Khan, shiba nem 'drugs-on-cruise' ken o dak sendakba nung bail agütsü, pa Honibarnü tepuokdak nungi chioktsü, ta metetdaksü.

"Tanü (Hokolbar) Aryan Khan tepuokdak nungi mechiktsü. Pa asüng (Honibar) ang chioktsü," ta jail ketdangsurtemi ashi.

Arthur Road Jail Superintendent, Nitin Waychal-i ashiba agi, "Pa (Aryan) chioktsü atema Arthur Road Jail kima bail box nung 'release order' indang copy ka inoktsütsüla. Iba bail box nung release order inoktsütsü atema jail ketdangsurtemi nikongdang

5:35 tashi ataogo."

Tanü (Hokolbar), Bombay High Court-i Aryan Khan indang 'bail order' tejangja ka agütsü, kong pua alisang (Aryan) ya Hokolbar shia Narcotics Control Bureau (NCB) dangi aotsüla aser pa indang passport agütsütsü asoshi shia lir.

Iba court-i applicant asempronlga - Aryan Khan, Arbaaz Merchantt aser Munmun Dhamecha nunger 11:00 nungi nikongdang 2:00 ako tashi NCB Mumbai office tashi tsüngdong aotsü asoshi tetuyuba agütsü.

Aryan indang bail order nung, "pai iba amala maparen nung madentsüla, külemi apurtem den contact asütsü memerangtsüla aser court nung

jembiba/inyaksangshiba tem media nung mejembitsüla," ta shia lir.

Iba ken o dak sendakba nung tesüiba anogo asem tashi court nung jembiba sülen, Brehostibarnü, Aryan Khan, Arbaaz Merchant aser Munmun Dhamecha nunger nem bail agütsü.

October 3, 2021 nü NCB-i Aryan Khan, Merchant aser Dhamecha nunger apu aser tenokdangba mozü/temesepba mozü achiba, alizükba aser bena aliba atema Narcotics Drugs and Psychotropic Substances Act (NDPS) kübok par asempronlga anema ken o benoka liasü. October 02, 2021 nü NCB team kati Cordelia Cruise ship mita aoba mapang Nigeria nunger ana densema nisung 20 shi apu.

NSF Trophy: Viswemi FC aser Headhunters na quarter final-i iogo



Kohima, Mongputeni/October 29, 2021: NSF Martyrs' Memorial Trophy asayamung nung, Asufii Christian Institute aser Headhunters tsungda asayaba mapang tangokba noksa ka yangi angur.

Kohima, Mongputeni/October 29, 2021 (TYO): Hokolbarnü, Indira Gandhi Stadium kübok 21buba NSF Martyrs' Memorial Trophy football asayamung nung Viswemi Football Club aser Headhunters team naprongla pei pei tata asaya takok anguba sülen, quarter final tongogo.

Mezüng match nung, Viswemi FC aser Bandits FC na asaya liasü. Iba asaya nung Viswemi FC puri goal 7-0 agi Bandits FC tsükdaktsü.

Iba asaya tenzüker mapang tatsüka tsungda, Viswemi FC atema Vilu Theyo-i minute 7buba nung mezüng goal inoktsü. Kelethuto Kin-i (16th, 39th aser 47th) hat-trick idaktsü. Iba sülen Kelengoto James, Kelengol Kikhi aser Metol Neikha nungeri team atema minute 51buba, 62buba aser 64buba nung goal ka ka bendenlokja liasü.

Asaya dak mapet yimya beshiba atema, Bandits FC nungi asayar Shahkham

Konyak nem red card agütsü. Taküm 21buba NSF Martyrs' Memorial Trophy tenzüker külen nungi asayar ka nem 'red card' agütsüba ya mezüng asütsü.

Kasa asayamung, tanabuba match nung, Headhunters aser Asufii Christian Institute Manipur na asaya liasü, kong Headhunters puri goal 3-1 Asufii Christian Institute tsükdakogo.

Iba asaya nung Headhunters atema Chingsha-i minute 32buba nung mezüng goal inoktsü. Break sülen, minute 46buba aser 63buba nung Mecievikho aser Samson nati goal tanabuba aser tasembuba idaktsü.

Asufii Christian Institute Manipur team atema Aziio Kajina-i goal ka idakja liasü.

Taruba Mongolbarnü (02.11.2021), iba asayamung quarter final pezübuba nung Viswemi FC aser Headhunters na tsungda asayatsü.

Honibar (30.10.2021)

atema asaya yamai alitsü:

1. Fifa FC vs All Nagaland Taxi Association @ 12:30 PM
2. A Yhome FC Vs Hurricane Boys @ 2:00 PM

Tebur cricket nung Sarah Taylor mezüng tetsür coach kümogo



New Delhi, Mongputeni/October 29, 2021 (Agencies): Taoba mapang England tetsür cricket team nung wicket-keeper batter Sarah Taylor ya 'men's professional franchise cricket' nung mezüng tetsür coach kümogo.

Abu Dhabi T10 league, koba November 19, 2021 nungi tenzüksü, iba league atema Team Abu Dhabi indang assistant coach inyaksü asoshi Sarah shimba sülen, tebur cricket nung tetsür coach inyaker rongnung la mezüng asütsü.

United Kingdom nung tebur indang county Club nung Sarah ya tetsür rongnung mezüng specialised coach ka kümogo. Tetsür cricket nung Sarah ya wicket-keeper tajungtiba ama ajaki züngshir.

T10 league nung adenba ajanga alima tesem ajunga nung

tetsürtem ajungmesotsü imlar, ta Sarah-i lemsatpe; aser lai Team Abu Dhabi den külemi inyakba ajanga tarutsü nung tetsürtem nem jenjang ka agütsütsü.

Arishi küm 32 tain Sarah Taylor-i 2006 küm international cricket nung ajemoka shilem agi tenzüker aser 2019 küm cricket asaya nungi manandang, lai Tests 10, ODIs 126 aser T20Is 90 asayaogo.

United Kingdom nung The Hundred aser 2021 Women's Twenty20 Cup nung shilem agitsü tebilemba nung, taküm tsüklawa mapang Sarah-i tanaben professional cricket nung dena liasü.

Tanga asayartemi (tetsür) la tsüngsü nung anidaka aser la ajanga tetsür aika ajungmesotsü imlar, ta Sarah-i lemsatpe.

"Iba ama maongka ya tarutsü nunga yimya/inyakyim ka ama inyaka aotsü imlar aser

tebur cricket team ka nung coach inyaksü maongka anguba ya ni mezüng asütsü akok, saka iba ya tetenzüker ka kümdaktsüner. Coach inyaksü jangrar aser tebur den külemi jenjang/sabang ka nung maparen lemsatpe inyaker ama, koba jangratemtsüka lir," ta Sarah-i ashi.

"Tebur den külemi maparen balala nung inyaksü asoshi kodanga timtem ajurudanga mali aser iba tayongzükba agizüktetogo. Shiba südir süaka pei nem nüngloksüba maparen/tenyaba mapatem tajungtiba nung inyaka sayutsü meranger," ta lai ashi.

Head coach Paul Farbrace den Taylor-i assistant coach ama inyaksü. Sarah-i England team nung asayaba mapang, team-i ICC Women's World Cups aser ICC Women's T20 World Cup takok ngua lir. Sarah-i England team tenüng nungi asaya 226 nung shilem agiogo.

Taoba mapang, South Africa all-rounder Lance Klusener, shibai tang tasayadak aliba T20 World Cup nung Afghanistan team indang head coach inyakdar, pa-a Team Abu Dhabi nung denogo.

Sarah-i Sussex kübok Bede's School nung coach inyaker. Lai ano cricket asayatsü asoshi maongka angu, saka Team Abu Dhabi nung coach inyaksü atema lai asayatem nung shilem magitsü lemtet.

Leander Paes TMC nung denogo

Mongputeni/October 29, 2021 (Agencies):

Hokolbarnü, Goa nung India nunger tennis asayar Leander Paes-i Trinamool Congress (TMC) nung denogo. Mamata Banerjee matsüngdang Paes-i iba party nung adenba aser iba sentong nung Mamata-i, tennis star Paes ya kü adianu tanubusang ama lir, ta ashi.

Mamata-i, "Leander Paes TMC nung adenba osang pelashishia sangdonger. Party nung pa adenba atema pelar. Paes ya kü adianu tanubusang lir. Ni youth minister inyaka aliba mapang nungi pa meteta aküm aser iba mapang pa lanur ka dang liasü," ta ashi.

Kasa anogo, Goa kübok Paes party nung adenba sentong nungsa actor aser activist Nafisa Ali-ia TMC nung dena liasü.

Iba sentong nung TMC puri party nung züngsem tasen Paes pelashishia agizükogo.

"TMC Chairperson,

Mamata matsüngdang Leander Paes party nung adenba osang pelashishia sangdonger! Asenek ajak longjemer linük ajungtsü asoshi inyaksü," ta Twitter nung TMC-i lemsatpe.

Tarep (doubles) nung tennis asayar takotet ka ama ajaki jangjaa alisang, Paes-i Davis Cup asayamung nung otsütsüsa tarep asaya timba takok ngua lir. Iba den külemi, Paes-isa tebur tarep 8ben aser temeyoktep tarep Grand Slam title 10 tashi takok ngua lir.

Maneni, tebur tarep aser temeyoktep tarep nung Paes-i Grand Slam ngua lir; aser 1999 Wimbledon Championships nung pai tebur tarep/temeyoktep tarep jenjang ajangzükta lir.

2010 küm Paes-i temeyoktep tarep Wimbledon title takok angu aser pai iba title ajangzükta ajanga Rod Laver sülen iba jenjang ajangzükta rongnung pa asayar tanabuba aküm.

AR-i Longding nung sobaliba saispongtem ayongzük

Longding, Mongputeni/October 29, 2021 (TYO): Hokolbarnü, HQ IGAR (North) kübok Assam Rifles indang Longding Battalion-i Longding Town (Arunachal Pradesh) nung "Wancho Indigenous Sports Competition" (Wancho Kin indang sobaliba saispong tetoktepba) ayongzükba liasü, ta sangdong ajanga metetdaksü.

Wancho kin indang sobaliba saispongtem talisa Zubey (Tug of war), Zo-Phak Avuk (Bamboo race), Pah Dau (Javelin Throw) aser Zo-Nga (Bamboo climbing)

ajungkettsütsü nükjidong nung, Wancho Cultural Society den Assam Rifles indang Longding Battalion longjemer iba asayamung ayongzük.

Iba asayamung nung, yimertemi tejangraba tulu nung sobaliba sübosülemtsü semer shilem agia liasü. Lisopur lanurtem aser Wancho kin ajangzükda tsütsü nükjidong yur sobaliba saispongtem ayongzükba atema lisopurtemi Assam Rifles dang pelaba metetdaksüogo, ta kasa sangdong nung shia lir.

Boxing World Championships: Akash Kumar pre-quarterfinal tongogo

Belgrade, Mongputeni/October 29, 2021 (Agencies):

Hokolbarnü, 2021 AIBA Men's Boxing Championships asayamung nung, India nunger Akash Kumar (54kg) aser Germany nunger Omar Salah Ibrahim na asayatsü renem, saka Omar temang nung timtem aliba yong pai iba bout nung shilem magitetsüsa akümba sülen 'walkover' ajanga Akash pre-quarterfinal-i iogo.

Round of 16 nung, Akashi Puerto Rico nunger Pagan Caleb Tirado den asayatsü.

"Pa (Akash) den tsüngteptsü alisang (Omar) temang nung timtem aliba ajanga tanep 'weigh-in' atema pa maru. Ibayongji Akash pre-quarterfinal nung asayatsü maongka angu," ta India High-Performance Director Santiago Nieva-i ashi.

Kasa mapang, külem India nunger Varinder-a temang meta shirangba ajanga, 60kg category bout nung pai shilem

magitet. Varinder temang meta shirangaka, pa dak Covid-19 meputet.

Asaya tanga ka nung, Akash Sangwan (67kg)-i Germany nunger pugilist Daniel Krotter madak 4-1 agi takok ngua pre-quarterfinal tongogo. Arishi küm 21 tain Sangwan-i Cuba nunger Kevin Brown den pre quarterfinal asayatsü.

Honibarnü, pungoben Asian medal takok angur Shiva Thapa (63.5kg) den külem India nunger boxer asem tashi asayatsü terenemba lir. Round of 32 nung Thapa-i Sierra Leone nunger John Brown den tsüngteptsü.

Ano, Sumit (75kg)-i Tajikistan nunger Abdumalik Boltayev den asayatsü. Kasa anogo, Sachin (80kg)-i America nunger Robby Gonzales den asayatsü. Bout anaprongla round of 32 asütsü.

Pre-quarterfinal tanga ka nung Govind Sahani (48kg)-i Georgia nunger Sakhil Alakhverdovi den asayatsü.

BILEMDANGANG

"Kiyonger timtem anogo nung na pelara yakta nü dangia kasa anogoji arutsü."